



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
14 Janeiro 2021
Parlamentu Nasionál

JSMP apresia aas Parlamentu Nasionál ne'ebé hasai imunidade membru deputadu sira ho votu maioria kualifikada

Parlamentu Nasionál (PN) liuhusi reuniaun plenária iha loron Segunda, 11 Janeiro 2021, halo aprovasaun ba pedidu levantamentu imunidade ba deputadu na'in tolu iha Parlamentu Nasionál hodi bele hatán ba pedidu Ministériu Públiku (MP) nian atu fó deklarasaun ho kualidade nu'udar testemuña iha Gabinete Sentrák Kombate Korrupsaun no Kriminálidade Organizada, iha edifísiu Prokuradór Jerál Repúblika.

Rezultadu votasaun ba deputadu Antonio da Conceição ho votu afavór 55, kontra 1, abstein 6, votu branku 0, no votu nulu 0. Rezultadu votasaun ba deputada Sra. Maria Angelina Lopes Sarmiento ho votu afavór 56, kontra 1, abstein 4, votu branku 0, no votu nulu 1. Entretantu rezultadu votasaun ba deputadu Sr. Luís Roberto da Silva ho votu afavór 56, kontra 1, abstein 4, votu branku 0, no votu nulu 1. Total deputadu ne'ebé partisipa iha votsaun hamutuk nain 62.

“JSMP apresia aas ba deputadu sira tanba maioria hakarak kontribui ba prosesu justisa hodi hasai imunidade deputadu sira ne'ebé iha konflitu ho lei sein diskusaun barak. Aktu ida ne'e nu'udar lisaun di'ak iha futuru liuliu relasiona ho kazu korrupsaun tanba públiku durante ne'e preokupa ho imunidade membru deputadu no membru governu sira-nian no konsidera hanesan dezafiu ba justisa”, dehan Diretora Ezekutiva JSMP, Ana Paula Marçal.

JSMP fiar katak asaun pozitivu hosi Parlamentu nian ne'e bele kontribui ba aselera prosesu justisa tantu iha faze investigasaun iha Ministériu Públiku no mós prosesu julgamentu iha tribunál sira.

Deputadu sira ne'ebé mak hetan levantamentu imunidade mak hanesan deputadu Antonio da Conceicao sei presta deklarasaun nu'udar testemuña ba kazu ho NUC. 007/19 CACTL no Tuir pedidu Ministériu Públiku kazu refere sei agenda atu presta deklarasaun iha 13 Janeiro 2021.

Entretantu deputadu/a Vise-Presidente PN na'in rua Sra. Maria Angelina Lopes Sarmiento ho Sr. Luís Roberto da Silva sei presta deklarasaun nu'udar testemuña ba

kazu “*koasaun hasoru órgaun konstitusionál*” ho nia NUC.0035.20/. PGGCC ne’ebé sei presta deklarasaun liuhusi resposta pergunta eskrita ba Ministériu Públiku.

Kazu ne’e, keixa husi representante Bankada Parlamentár Fretilin, PLP no KHUNTO hodi resposta ba karta aberta ne’ebé hato’o husi Asosiasaun Kombatenes Brigada Negra asinadu husi Sr. Nuno Manuel Covelo de Andrade Sarmiento iha 15 Maiu 2020 liuba.

JSMP mós rekomenda ba PN atu kria lei própriu nu’udar matadalan própria ba suspensaun ba mandatu ka levantamentu imunidade deputadu sira-nian tuir provizaun Artigu 94 K-RDTL no Artigu 8 Lei Nú. 15/2009 ne’ebé altera ho Lei Nú. 1/2016 kona-ba Rejimentu PN. Lei própriu ida ne’ebé bele deskreve ho detallu kona-ba tipu krime sira ne’ebé bele prienxe kritériu atu hasai imunidade nomós kona-ba nia prosedimentu tantu polítiku, administrativu no judisiál hanesan JSMP mensiona iha relatóriu anuál 2019 nian iha pagina 8¹.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Website: <http://jsmp.tl>
www.jsmp.tl

¹ Atu hatene kle’an informasaun bele haree iha website JSMP: <https://jsmp.tl/wp-content/uploads/Relatoriu-anual-POP-2019-Tetun.pdf>